

Definitivamente na September lo cuminza a desmantela Lago

ORANJESTAD(AAN) — Manera DIARIO a anticipa cu na 1988 desmantelacion di Lago lo tuma lugar, ayera esaki a keda confirma despues cu Lago a firma e promer acuerdo cu Gobierno di Aruba cu ta encera desmantelacion y traspaso di algun edificio y e powerhouse situa ariba tereno di e refineria. Presente na e firmamento di e acuerdo tabata tur e Ministronan, e comision negociador di Aruba y esun di Lago.

Promer Ministro Eman a bisa cu a pasa den temporada di turbulencia emo-

cional caminda Gobierno hunto cu sector priva a haci todo por todo pa yega na un reapertura di e refineria.

Un delegacion special a viaha rond mundo acercando companianan cu por a habri e refineria. Mientras cu esaki tabata tumando lugar, Gobierno a haci tur esfuerzo pa yega na acuerdonan cu Exxon y Lago pa mira si acaso cu un reapertura bira dificil kico e alternativanan ta.

Durante e aña cu a pasa negociacionnan a tuma lugar intensivamente pero na un manera sumamente

dificil pasobra Lago, Exxon tabata di opinion cu por yega solamente na un acuerdo total. Esaki segun Eman tabata encera cu e claim di belasting cu Gobierno tin contra e compania cu ta 150 Mion Dollar lo mester keda un banda y tambe e otro partinan lo no haya e atencion adecuado cu Gobierno ta desea.

E negociacionnan a tranca y e situacion a empeora durante e aña cu a pasa. Sinembargo despues di diferente esfuerzo di ambos banda, na final di aña pasa a logra un cambio

drastico den e puntonan di vista y a yega na un areglo cu Lago lo acepta acuerdonan parcial ariba cada un di e topiconan cu Gobierno ta desea di discuti.

Segun Eman, Gobierno ta contento cu e acuerdo aki cu ta trece actividad atrobe ariba tereno di e refineria. Pronto tur e partinan y edificionan cu Aruba ta desea di haya lo worde traspasa y Lago lo cuminsa haci e tereno limpi, cual lo crea mas cuponan di trabao.

Segun presidente di e comision negociador, Every, promer cu dia 30 di

September lo cuminsa cu desmantelacion cual lo mester termina na 1994.

Presidente di Lago, George Reynolds a manifesta cu e promer paso cu Lago ta bay haci ta completa e especificacionnan pa e contratista cu lo haya e trabao di desmantelacion. Despues di esaki nan lo acerca diferente companianan internacional di desmantelacion. Ora selecta un di e contratistanan, esaki lo mester prepara su equiponan pa aborda un barco cu lo trece Aruba.

Malechornan a haci un desastre den Universidad di Aruba



ORANJESTAD(AAN) — Mientras otronan ta rondea e oportunidad pa sigui progreso den nan estudio, otronan ta purba di destrui loque otronan por siña for di e oportunidadnan.

Ayera mainta Profesor Dr. Brown a yega na e localidad di Universidad di Aruba na San Nicolas y a bin topa cu un desaster cu malhechornan a comete den oranan di anochi. Bukinan di gran balar a ser tira paki paya cashinan a worde forza y kibra, verf a worde benta aiba e filenan, mesa, stoel tur tira un banda.

Segun Dr. Brown un daño enorme ta tumando lugar na e school aki ya cu no ta promer biaha, pero den ultimo tempo varios biaha e caso aki



a yega di sosode.

Dr. Brown a duna di conoce tambe cu e school ta un school priva caminda Miles di persona a yega di bishita y a ricibi un diploma, certificado sin cu a pidi nunca

yudanza di gobierno, pero a yega tempo cu mester acerca Gobierno ya cu poco a poco e entrada cu e school ta ricibi no ta yega pa drecha locual a worde destrui na e school.

Lago kie cuminza cu transshipment na Aruba

ORANJESTAD(AAN) — Presidente di Lago, George Reynolds a manifesta cu Lago a dicidi cu lo no traspasa e transshipment incluyendo e dos reefbirdnan na Aruba.

Motibo pa e decision aki ta cu Lago mes tin interes pa cuminsa opera transshipment na Aruba. Reynolds a bisa cu un di e reefbirdnan ta den bon condicion y por cuminsa opera den un periodo hopi corto, mientras cu e segundo reefbird si ta rekeri cierto reparacionan promer cu e por cuminsa opera.

E intencion di Lago ta pa trece Aruba petroleo crudo den tanqueronan hopi grandi cu un capacidad di 300.000 Ton. E petroleo crudo lo worde deposita den e tankinan estableci ariba tereno di e

refineria y despues lo worde transporta pa tanqueronan mas chikito cu por ehemplo lo bay Estados Unidos, caminda e puerto no ta suficiente hundo pa ricibi e tanqueronan hopi grandi.

Segun Reynolds tambe tin e speculation cu inversionistanan ta cumpra e petroleo na prijs abao y ta warda esaki den tankinan te ora e prijs di petroleo subi pa despues bende esaki.

Presidente di e comision negociador, Every, a manifesta cu dentro di 9 luna Lago mester logra haya un compania pa transshipment y dentro di 6 luna despues di e 9 lunanan e facilidad mester ta operando. Si esaki no ta e caso, e transshipment ta worde traspasa pa Aruba.

Na Maart Gobierno lo sigui negocia cu Exxon

ORANJESTAD(AAN) — Durante un conferencia di prensa presidente di e comision negociador cu Exxon, Every, a manifesta cu na Maart nan lo bolbe sinta na mesa cu e grupo di Exxon pa sigui negociacionnan ariba un otro face.

Ministro Mansur a duna di conoce cu te ainda e dos gruponan no a combersa kico ta e siguiente tema cu nan lo bay discuti ariba. Segun Ministro Mansur,

tin dos punto principal cu ainda mester worde discuti. Uno ta ariba e asunto ambiental y e otro ariba e tereno pa cu e proyecto di Cero Colorado.

Presidente di Lago, Reynolds a manifesta e deseo pa sigui negocia. Tur cos ta indica cu lo no dura mucho mas cu Gobierno lo yega na un acuerdo cu Exxon ariba tur e asuntonan pendiente.